

## ॥प्रथमः प्रश्नः॥

॥तैत्तिरीयसंहितायां प्रथमकाण्डे प्रथमः प्रश्नः॥

इ॒षे त्वो॒र्जे त्वा॑ वा॒यवः॑ स्थोपा॒यवः॑ स्थ दे॒वो वः॑ सवि॒ता  
 प्रा॒रप॑यतु श्रेष्ठ॑तमा॒य क॑र्मण॒ आ प्या॑यध्वम॒घ्निया दे॒वभा॒गमूर्ज॑स्वतीः  
 पय॑स्वतीः प्र॒जाव॑तीरनमी॒वा अ॑य॒क्ष्मा मा वः॑ स्तेन॒ ईश॑त॒ मा-  
 ऽघ॑श॒सो रु॒द्रस्य॑ हे॒तिः परि॑ वो वृणक्तु ध्रु॒वा अ॒स्मिन्गोप॑तौ स्यात  
 ब॒ह्वीर्य॑ज॒मान॑स्य प॒शून्पा॑हि॥ (१)

इ॒षे त्रि॑च॒त्वारि॑श॒त॥ [१]

य॒ज्ञस्य॑ घो॒षद॑सि प्रत्यु॑ष्टः॒ रक्षः॑ प्रत्यु॑ष्टा अरा॑तयः  
 प्रेय॑म॒ंगाद्वि॑षणां ब॒र्हिर॑च्छ॒ मनु॑ना कृ॒ता स्व॒धया॑ वि॒त॑ष्टा त  
 आ॒व॑हन्ति क॒वयः॑ पु॒रस्ता॑द्वे॒वेभ्यो॑ जुष्ट॑मिह ब॒र्हिरा॑सदे॒ देवा॑नां  
 परि॑षूतम॒सि व॒र्षवृ॑द्धम॒सि दे॒वब॑र्हिर्मा त्वा॒ऽन्व॒ङ्गा ति॒र्यक्प॑र्व  
 ते रा॒ध्यास॑माच्छे॒त्ता ते मा रि॑षं दे॒वब॑र्हिः श॒तव॑ल्शं वि रो॒ह  
 स॒हस्र॑वल्शा (२)

वि व॒यः रु॑हेम पृथि॒व्याः स॒म्पृचः॑ पाहि सुस॒म्भृता॑ त्वा  
 स॒म्भ॑रा॒म्यदि॑त्यै रा॒स्नाऽसी॑न्द्रा॒ण्यै स॒न्नह॑नं पू॒षा ते॑ ग्र॒न्थिं ग्र॑न्थातु  
 स ते॒ माऽऽस्था॑दिन्द्र॒स्य त्वा बा॒हुभ्या॑मुद्य॑च्छे बृह॒स्पते॑र्मूर्धा  
 ह॑रा॒म्युर्व॑न्तरि॒क्षम॑न्वि॒हि दे॒वङ्ग॑मम॒सि॥ (३)

सहस्रं वल्शा अष्टात्रिंशच्च॥ [२]

शुन्धध्वं दैव्याय कर्मणे देवयज्यायै मातरिश्वनो घर्मोऽसि  
द्यौरसि पृथिव्यसि विश्वधाया असि परमेण धाम्ना द॒ह॒स्व मा  
ह्वा॒र्वसू॒नां प॒वित्र॑मसि श॒तधा॑रं वसू॒नां प॒वित्र॑मसि स॒हस्र॑धारं  
हुतः स्तो॒को हु॒तो द्र॒प्सोऽ॒ग्नये॑ बृ॒हते॑ नाकाय स्वाहा द्यावा-  
पृथि॒वीभ्या॑ ५ सा वि॒श्वायुः सा वि॒श्वव्य॑चाः सा वि॒श्वक॑र्मा  
सम्पृ॒च्यध्व॑मृतावरीरूर्मिणीर्मधु॑मत्तमा म॒न्द्रा धन॑स्य सा॒तये॑ सोमे॒न  
त्वाऽऽत॑न॒न्चीन्द्रा॑य॒ दधि॒ विष्णो॑ ह॒व्यं र॑क्षस्व॥ (४)

सोमेनाद्यौ च॥ [३]

कर्मणे वां देवेभ्यः शकेयं वेषाय त्वा प्रत्युष्टं ५ रक्षः प्रत्युष्टा  
अरा॑तयो धू॒रसि॑ धूर्व॒ धूर्व॑न्तं धूर्व॒ तं योऽ॒स्मान्धूर्व॑ति॒ तं धूर्व॑ यं  
व॒यं धूर्वा॑म॒स्त्वं दे॒वाना॑मसि स॒स्त्रित॑मं प॒प्रित॑मं जुष्ट॑तमं व॒ह्नि॑तमं  
दे॒व॒हूत॑म॒म॒हुत॑मसि ह॒वि॒र्धानं॑ द॒ह॒स्व मा ह्वा॑र्मि॒त्रस्य॑ त्वा चक्षु॑षा  
प्रेक्षे॒ मा भे॑र्मा सं वि॒क्था मा त्वा॑ (५)

हि॒सिष॑मुरु वा॒ताय॑ दे॒वस्य॑ त्वा स॒वि॒तुः प्र॑स॒वेऽ॒श्विनो॑र्बा॒हुभ्या॑  
पू॒ष्णो ह॑स्ता॒भ्याम॒ग्नये॑ जुष्टं निर्व॑पाम्य॒ग्रीषोमा॑भ्यामिदं दे॒वाना॑मिदमु॒  
नः स॒ह स्फा॑त्यै त्वा ना॒रा॑त्यै सु॒व॒र॒भि वि॒ ख्ये॑षं वैश्वान॑रं  
ज्योति॑र्द॒ह॒न्ता॒न्दुर्या॑ द्यावा॑पृथि॒व्योर्ब॑न्त॒रि॒क्षम॑न्वि॒ह्यदि॑त्यास्त्वो-  
प॒स्थे सा॑दया॒म्यग्रे॑ ह॒व्यं र॑क्षस्व॥ (६)

मा त्वा षट्त्वारिंशच्च॥ [४]

देवो वः सवितोत्पुनात्वच्छिद्रेण पवित्रेण वसोः सूर्यस्य  
रश्मिभिरापो देवीरग्रेषुवो अग्रेगुवोऽग्रं इमं यज्ञं नयताग्रे  
यज्ञपतिं धत्त युष्मानिन्द्रोऽवृणीत वृत्रतूर्ये यूयमिन्द्रमवृणीध्वं  
वृत्रतूर्ये प्रोक्षिताः स्थाग्रये वो जुष्टं प्रोक्षाम्यग्नीषोमाभ्यां  
शुन्धध्वं दैव्याय कर्मणे देवयज्याया अवधूतं रक्षोऽवधूता  
अरातयोऽदित्यास्त्वगंसि प्रति त्वा (७)

पृथिवी वैत्वधिषवणमसि वानस्पत्यं प्रति त्वा-  
ऽदित्यास्त्वग्वैत्वग्नेस्तनूरसि वाचो विसर्जनं देववीतये त्वा  
गृह्णाम्यद्रिरसि वानस्पत्यः स इदं देवेभ्यो हव्यं सुशमिं  
शमिष्वेषमा वदोर्जमा वद द्युमद्वदत वयं सङ्घातं जैष्म  
वर्षवृद्धमसि प्रति त्वा वर्षवृद्धं वेत्तु परापूतं रक्षः परापूता  
अरातयो रक्षसां भागोऽसि वायुर्वो विविनक्तु देवो वः सविता  
हिरण्यपाणिः प्रति गृह्णातु॥ (८)

त्वा भाग एकादश च॥ [५]

अवधूतं रक्षोऽवधूता अरातयोऽदित्यास्त्वगंसि प्रति त्वा  
पृथिवी वैत्तु दिवः स्कम्भनिरसि प्रति त्वाऽदित्यास्त्वग्वैत्तु धिषणा-  
ऽसि पर्वत्या प्रति त्वा दिवः स्कम्भनिर्वैत्तु धिषणाऽसि पार्वतेयी  
प्रति त्वा पर्वतिर्वैत्तु देवस्य त्वा सवितुः प्रसवेऽश्विनोर्बाहुभ्यां पूष्णो

हस्ताभ्यामधि॒वपामि॑ धान्य॑मसि धिनु॒हि दे॒वान्प्रा॒णाय॑ त्वाऽपा॒नाय॑  
त्वा व्या॒नाय॑ त्वा दी॒र्घामनु॑ प्रसि॑तिमायुषे धां दे॒वो वः॑ सवि॒ता  
हि॒र॑ण्यपा॒णिः प्र॑ति गृह्णातु॥ (९)

प्राणायं त्वा पञ्चदश च॥ \_\_\_\_\_ [६]

धृष्टि॑रसि ब्रह्म॑ यच्छापा॑ऽग्नेऽग्निमा॒माद॑ जहि निष्क्र॒व्याद॑  
से॒धा दे॒वय॑जं वह॒ निर्दग्ध॑ रक्षो॒ निर्दग्धा॑ अरा॑तयो ध्रुवम॑सि  
पृथि॑वीं दृ॒हाऽऽयु॑र्दृ॒ह प्र॒जां दृ॒ह स॒जा॒तान॒स्मै य॒ज॒मा॒नाय॑  
पर्यू॑ह ध॒त्रम॑स्यन्तरि॒क्षं दृ॒ह प्रा॒णं दृ॒हापा॑नं दृ॒ह स॒जा॒तान॒स्मै  
य॒ज॒मा॒नाय॑ पर्यू॑ह ध॒रुण॑मसि दि॒वं दृ॒ह चक्षु॑र् (१०)

दृ॒ह श्रो॑त्रं दृ॒ह स॒जा॒तान॒स्मै य॒ज॒मा॒नाय॑ पर्यू॑ह धर्मा॑ऽसि  
दिशो॑ दृ॒ह योनिं॑ दृ॒ह प्र॒जां दृ॒ह स॒जा॒तान॒स्मै य॒ज॒मा॒नाय॑ पर्यू॑ह  
चितः॑ स्थ प्र॒जाम॒स्मै र॒यिम॒स्मै स॒जा॒तान॒स्मै य॒ज॒मा॒नाय॑ पर्यू॑ह  
भृ॒गूणा॑मङ्गि॒रसां॑ तप॑सा तप्य॒ध्वं या॒नि घ॒र्मे क॒पाला॑न्युपचि॒न्वन्ति॑  
वे॒धसः॑। पू॒ष्णस्ता॒न्यपि॑ व्र॒त इन्द्र॑वा॒यू वि मु॑ञ्चताम्॥ (११)

चक्षुर्गुष्टार्चत्वारिंशच्च॥ \_\_\_\_\_ [७]

सं व॑पामि समा॒पो अ॒द्विर॑ग्मत॒ समोष॑धयो रसे॒न स॑  
रे॒वती॑र्जग॑तीभिर्मधु॑मती॒र्मधु॑मतीभिः सृज्य॒ध्वम॒द्भ्यः परि॑ प्रजा॑ताः  
स्थ॒ सम॒द्विः पृ॒च्यध्वं॑ जन॑यत्यै त्वा सं यौ॒म्यग्र॑यै त्वाऽग्नी॒षोमा॑भ्यां

म॒खस्य॑ शिरो॑ऽसि घ॒र्मो॑ऽसि वि॒श्वायु॑रुरु प्र॒थस्वो॑रु ते य॒ज्ञप॑तिः  
 प्रथतां॑ त्वचं॑ गृ॒ह्णीष्व॑ऽन्तरि॑तुं र॒क्षो॑ऽन्तरि॑ता अरा॑तयो दे॒वस्त्वा॑  
 सवि॑ता श्र॒पय॑तु व॒र्षि॑ष्ठे अधि॑ नाके॒ऽग्निस्ते॑ त॒नुवं॑ माऽति॑ धा॒गग्रे॑  
 ह॒व्यं र॑क्षस्व सं ब्र॒ह्म॑णा पृ॒च्यस्वैक॑ताय॒ स्वाहा॑ द्वि॒ताय॒ स्वाहा॑  
 त्रि॒ताय॒ स्वाहा॑॥ (१२)

स॒विता॑ द्वावि॑ंशतिश्च॥ ————— [८]

आद॑द् इन्द्र॑स्य बा॒हुर॑सि दक्षि॑णः स॒हस्र॑भृष्टिः श॒तते॑जा  
 वा॒युर॑सि ति॒ग्मते॑जाः पृथि॑वि दे॒वय॑ज॒न्योष॑ध्यास्ते मूलं॑ मा  
 हि॑ं॒सिष॑मप॒हतो॑ऽरुः पृथि॒व्यै व्र॒जं ग॑च्छ गो॒स्थानं॑ व॒र्षतु॑ ते  
 द्यौर्ब॑धान दे॒व स॑वितः पर॒मस्यां॑ परा॒वति॑ श॒तेन॑ पाशै॒र्यो॑ऽस्मान्द्वेष्टि  
 यं च॑ व॒यं द्वि॑ष्मस्तमतो॒ मा मौ॑गप॒हतो॑ऽरुः पृथि॒व्यै दे॒वय॑ज॒न्यै  
 व्र॒जं (१३)

ग॑च्छ गो॒स्थानं॑ व॒र्षतु॑ ते द्यौर्ब॑धान दे॒व स॑वितः पर॒मस्यां॑  
 परा॒वति॑ श॒तेन॑ पाशै॒र्यो॑ऽस्मान्द्वेष्टि यं च॑ व॒यं द्वि॑ष्मस्तमतो॒ मा  
 मौ॑गप॒हतो॑ऽरुः पृथि॒व्या अ॒दे॒वय॑जनो व्र॒जं ग॑च्छ गो॒स्थानं॑ व॒र्षतु॑  
 ते द्यौर्ब॑धान दे॒व स॑वितः पर॒मस्यां॑ परा॒वति॑ श॒तेन॑ पाशै॒र्यो॑ऽस्मान्द्वेष्टि  
 यं च॑ व॒यं द्वि॑ष्मस्तमतो॒ मा (१४)

मौ॒ग॒रु॒स्ते दि॒वं मा॒ स्कान्॑ वस॑वस्त्वा परि॑गृह्णन्तु गाय॒त्रेण॑  
 छ॒न्द॑सा रु॒द्रास्त्वा॑ परि॑गृह्णन्तु त्रैष्टु॑भेन॒ छ॒न्द॑साऽऽदि॒त्यास्त्वा॑

परिगृह्णन्तु जागतेन छन्दसा देवस्य सवितुः सवे कर्म कृण्वन्ति  
 वेधसं ऋतमस्यृतसदनमस्यृतश्रीरसि धा असि स्वधा अस्युर्वी  
 चासि वस्वी चासि पुरा क्रूरस्य विसृपो विरप्शिन्नुदादाय  
 पृथिवीं जीरदानुर्यामैरयं चन्द्रमसि स्वधाभिस्तान्धीरासो अनुदृश्य  
 यजन्ते॥ (१५)

देवयजन्ये व्रजन्तमतो मा विरप्शिन्नेकादश च॥ [१]

प्रत्युष्टं रक्षः प्रत्युष्टा अरांतयोऽग्नेर्वस्तेजिष्ठेन तेजसा  
 निष्टपामि गोष्ठं मा निर्मृक्षं वाजिनं त्वा सपत्नसाहं सम्माज्मि  
 वाचं प्राणं चक्षुः श्रोत्रं प्रजां योनिं मा निर्मृक्षं वाजिनीं त्वा  
 सपत्नसाहीं सम्माज्म्याशासाना सौमनसं प्रजां सौभाग्यं  
 तनूम्। अग्नेरनुव्रता भूत्वा सन्नह्ये सुकृताय कम्। सुप्रजसंस्त्वा  
 वयं सुपत्नीरुपं (१६)

सेदिम। अग्नें सपत्नदम्भनमदब्धासो अदाभ्यम्। इमं विष्यामि  
 वरुणस्य पाशं यमबन्धीत सविता सुशेवः। धातुश्च योनौ सुकृतस्य  
 लोके स्योनं मे सह पत्यां करोमि। समायुषा सम्प्रजया समग्ने  
 वर्चसा पुनः। सम्पत्नी पत्याऽहं गच्छे समात्मा तनुवा मम। महीनां  
 पयोऽस्योषधीनां रसस्तस्य तेऽक्षीयमाणस्य निर्- (१७)

वंपामि महीनां पयोऽस्योषधीनां रसोऽदब्धेन त्वा चक्षुषा-  
 ऽवेक्षे सुप्रजास्त्वाय तेजोऽसि तेजोऽनु प्रेह्यग्निस्ते तेजो मा वि

नै॒दग्नेर्जि॒ह्वाऽसि॑ सु॒भूर्दे॒वानां॑ धाम्ने॑धाम्ने दे॒वेभ्यो॑ यजु॑षेयजुषे भव  
 शु॒क्रम॑सि॒ ज्योति॑रसि॒ तेजो॑ऽसि दे॒वो वः॑ सवि॒तोत्पु॑ना॒त्वच्छि॑द्रेण  
 प॒वित्रे॑ण॒ वसोः॑ सूर्य॑स्य र॒श्मिभिः॑ शु॒क्रं त्वा॑ शु॒क्रायां॑ धाम्ने॑धाम्ने  
 दे॒वेभ्यो॑ यजु॑षेयजुषे गृह्णामि॒ ज्योति॑स्त्वा॒ ज्योति॑ष्य॒र्चिस्त्वा॒ऽर्चिषि॑  
 धाम्ने॑धाम्ने दे॒वेभ्यो॑ यजु॑षेयजुषे गृह्णामि॥ (१८)

उप॒ नी र॒श्मिभिः॑ शु॒क्रं षोड॑शं च॥ ————— [१०]

कृ॒ष्णो॑ऽस्याखरे॒ष्ठोऽग्नये॑ त्वा॒ स्वाहा॑ वेदि॑रसि ब॒र्हिषे॑ त्वा॒  
 स्वाहा॑ ब॒र्हिर॑सि स्रु॒ग्न्यस्त्वा॒ स्वाहा॑ दि॒वे त्वा॒ऽन्तरि॑क्षाय त्वा  
 पृथि॑व्यै त्वा॑ स्व॒धा पि॒तृभ्य॑ ऊ॒र्ध्वं ब॒र्हिष॑द्भ्य ऊ॒र्जा पृथि॑वीं  
 गच्छ॑तु वि॒ष्णोः॒ स्तूपो॑ऽस्यूर्णा॑म्रदसं त्वा स्तृणामि स्वास॒स्थं दे॒वेभ्यो॑  
 गन्ध॑र्वोऽसि वि॒श्वाव॑सुर्वि॒श्वस्मा॑दीष॒तो यज॑मानस्य परि॒धिरि॒ड  
 ईडि॑त इन्द्र॑स्य बा॒हुर॑सि (१९)

दक्षि॑णो यज॑मानस्य परि॒धिरि॒ड ईडि॑तो मि॒त्रावरु॑णौ  
 त्वोत्त॑रतः परि॒धत्तां ध्रु॑वेण॒ धर्म॑णा॒ यज॑मानस्य परि॒धिरि॒ड ईडि॑तः  
 सूर्य॑स्त्वा पु॒रस्ता॑त्पातु॒ कस्या॑श्चिद॒भिष॑स्त्या वी॒तिहो॑त्रं त्वा कवे  
 द्युम॑न्त॒ः समि॑धीम॒ह्यग्रे॑ बृ॒हन्त॑मध्वरे वि॒शो य॒त्रे स्थो॑ वसू॒नां  
 रु॒द्राणा॑मादित्या॒नां स॑दसि सीद जुहू॒रुप॑भृद्भुवा॑सि घृ॒ताची॑ नाम्ना॑  
 प्रि॒येण॑ नाम्ना॑ प्रि॒ये स॑दसि सीदे॒ता अ॑सदन्ध॒सुकृ॑तस्य लो॒के ता

विष्णो पाहि पाहि यज्ञं पाहि यज्ञपतिं पाहि मां यज्ञनियम्॥ (२०)

बाहुरसि प्रिये सदैसि पञ्चदश च॥ [११]

भुवनमसि वि प्रथस्वाग्ने यष्टरिदं नमः। जुह्वेह्यग्निस्त्वा ह्वयति  
देवयज्याया उपभृदेहि देवस्त्वा सविता ह्वयति देवयज्याया  
अग्नाविष्णू मा वामव क्रमिषं वि जिहाथां मा मा सन्ताप्तं लोकं  
मे लोककृतौ कृणुतं विष्णोः स्थानमसीत इन्द्रो अकृणोद्वीर्याणि  
समारभ्योर्ध्वो अध्वरो दिविस्पृशमहुतो यज्ञो यज्ञपतेरिन्द्रा-  
वान्थस्वाहा बृहद्वाः पाहि मां ऽग्ने दुश्चरितादा मा सुचरिते भज  
मुखस्य शिरोऽसि सं ज्योतिषा ज्योतिरङ्गाम्॥ (२१)

अहुत एकविंशतिश्च॥ [१२]

वाजस्य मा प्रसवेनोद्ग्राभेणोदग्रभीत्। अथा सपत्नाः इन्द्रो मे  
निग्राभेणार्धराः अकः। उद्ग्राभं च निग्राभं च ब्रह्म देवा अवीवृधन्।  
अथा सपत्नानिन्द्राग्नी मे विषूचीनान्व्यस्यताम्। वसुभ्यस्त्वा  
रुद्रेभ्यस्त्वाऽऽदित्येभ्यस्त्वाऽक्तः रिहाणा वियन्तु वयः। प्रजां  
योनिं मा निर्मृक्षमा प्यायन्तामाप ओषधयो मरुतां पृषतयः स्थ  
दिवं (२२)

गच्छ ततो नो वृष्टिमेरय। आयुष्पा अग्नेऽस्यायुर्मे पाहि चक्षुष्पा  
अग्नेऽसि चक्षुर्मे पाहि ध्रुवाऽसि यं परिधिं पर्यधत्था अग्ने देव  
पणिभिर्वीयमाणः। तन्त एतमनु जोषं भरामि नेदेष त्वदपचेतयातै



य॒ज्ञस्य॒ पाथ॒ उप॒ समि॑तः स॒ऽस्रा॒वभा॑गाः स्थे॒षा बृ॑हन्तः प्र॒स्तरे॒ष्ठा  
ब॒र्हिष॑दश्च (२३)

दे॒वा इ॒मां वाच॑म॒भि विश्वे॑ गृ॒णन्त॑ आ॒सद्या॑स्मिन्ब॒र्हिषि॑  
मादय॑ध्वम॒ग्नेर्वा॒मप॑न्नगृहस्य॒ सद॑सि सा॒दयामि॑ सु॒म्नाय॑ सु॒म्निनी॑ सु॒म्ने  
मां धत्तं॑ धुरि॒ धुर्यो॑ पा॒तम॒ग्नेऽद॒व्यायोऽशी॑ततनो पा॒हि मा॒ऽद्य दि॒वः  
पा॒हि प्र॑सि॒त्यै पा॒हि दुरि॑ष्ठ्यै पा॒हि दुर॑द्भ॒न्यै पा॒हि दु॒श्च॑रिता॒दवि॑षन्नः  
पि॒तुं कृ॑णु सु॒षदा॒ योनि॑ः॒ स्वाहा॒ देवा॑ गा॒तुवि॑दो गा॒तुं वि॒त्वा  
गा॒तुमि॑त॒ मन॑सस्पत इ॒मं नो॑ देव दे॒वेषु॑ य॒ज्ञः स्वाहा॑ वा॒चि स्वाहा॑  
वाते॑ धाः॥ (२४)

दिवश्च वि॒त्वा गा॒तुत्रयो॑दश च॥ [१३]

उ॒भा वा॑मिन्द्रा॒ग्नी आ॑हुव॒ध्या उ॒भा राध॑सः स॒ह मा॑दय॒ध्वै उ॒भा  
दा॒तारा॑वि॒षाः र॑यी॒णामु॒भा वाज॑स्य सा॒तयै॑ हुवे वाम्। अश्र॑वः  
हि भूरि॑दाव॒त्तरा॑ वां वि जा॑मातुरु॒त वां घा॑ स्या॒लात्। अथा॑  
सोम॑स्य॒ प्रय॑ती यु॒वभ्या॑मिन्द्रा॒ग्नी स्तोमं॑ जनयामि॒ नव्य॑म्। इन्द्रा॒ग्नी  
नव॑तिं पुरो॑ दा॒सप॑त्नीरधूनुतम्। सा॒कमे॑केन॒ कर्म॑णा। शुचिं॑ नु स्तोमं॒  
नव॑जातम॒द्येन्द्रा॒ग्नी वृ॒त्रह॑णा जुषेथा॑म्॥ (२५)

उ॒भा हि वा॑ः सु॒हवा॒ जोह॑वीमि॒ ता वाज॑ः स॒द्य उ॑शते  
धेष्ठा॑। व॒यमु॑ त्वा पथस्पते॒ रथं॑ न वाज॑सातये। धि॒ये पू॑षन्नयुज्महि।  
प॒थस्प॑थः परि॑पतिं वच॒स्या कामे॑न कृ॒तो अ॒भ्या॑नड॒र्कम्। स नो॑

रासच्छुरुधंश्चन्द्राग्रा धियं धियं सीषधाति प्र पूषा। क्षेत्रस्य पतिना  
वयं हितेनेव जयामसि। गामश्च पोषयित्वा स नो (२६)

मृडातीदृशे। क्षेत्रस्य पते मधुमन्तमूर्मि धेनुरिव पयो  
अस्मासु धुक्वा मधुश्रुतं घृतमिव सुपूतमृतस्य नः पतयो  
मृडयन्तु। अग्रे नयं सुपथा राये अस्मान् विश्वानि देव वयुनानि  
विद्वान्। युयोध्यस्मञ्जुराणमेनो भूयिष्ठान्ते नम उक्तिं विधेम।  
आ देवानामपि पन्थामगन् यच्छक्रवाम तदनु प्रवौढुम्।  
अग्निर्विद्वान्त्स यंजात् (२७)

सेदु होता सो अध्वरान्त्स ऋतून्कल्पयाति। यद्वाहिष्ठं तदग्नये  
बृहदर्चं विभावसो। महिषीव त्वद्रयिस्त्वद्वाजा उदीरते। अग्रे त्वं  
पारया नव्यो अस्मान्स्वस्तिभिरति दुर्गाणि विश्वा। पूश्च पृथ्वी  
बहुला न उर्वी भवा तोकाय तनयाय शं योः। त्वमग्रे व्रतपा  
असि देव आ मर्त्येष्व। त्वं यज्ञेष्वीड्यः। यद्वो वयं प्रमिनाम  
व्रतानि विदुषा देवा अविदुष्टरासः। अग्निष्टद्विश्चमा पृणाति विद्वान्  
येभिर्देवां ऋतुभिः कल्पयाति॥ (२८)

जुषेथामा स नो यजादा त्रयोविंशतिश्च॥ [१४]

इषे त्वां यज्ञस्य शुन्यध्वं कर्मणे देवोऽवधूतनृष्टिः सं वपाभ्या ददे प्रत्युष्टं कृष्णोऽसि भुवनमसि

वाजंस्योभा वां चतुर्दश॥१४॥

इषे दृहं भुवनमृष्टाविंशतिः॥२८॥

इषे त्वां कल्पयामि॥

हरिः ॐ॥

॥कृष्ण-यजुर्वेदीय-तैत्तिरीय-संहितायां प्रथमकाण्डे प्रथमः प्रश्नः  
समाप्तः॥१-१॥



generated on **February 28, 2025**

Downloaded from



<http://stotrasamhita.github.io> |  StotraSamhita | Credits